

# Aua per l'Europa

Il Grischun all'Expo Milano 2015

DA GIUSEP VENZIN / ANR

■ **En dus meins arva l'exposiziun mundiala Expo Milano 2015 las portas. Il Grischun nezegia la vischinonza e se presenta alla fiera mundiala a moda multifara. Il tema dall'exposiziun tenida el vest da Milaun e bie-bein 30 kilometers naven dalla Svizra stat sut il moto «Nutrir il planet, energia per la veta».** En collaboraziun culs ulteriurs treis cantuns dil Gottard, il Tessin, igl Uri ed il Valleis, presenta il Grischun cull'exposiziun «Aua per l'Europa» nutriment ed energia. Dils 8 tochen ils 11 da zercladur e dils 1 tochen ils 5 d'october stattan la tribuna, igl auditori e la sala d'occurrzas dil pavigliun svizzer al Grischun a disposiziun. Ils 10 da zercladur ei la cussegliera federala *Eveline Widmer-Schlumpf* presenta al di dils officials grischuns. Il pavigliun svizzer ei piazzaus denter il pavigliun talian ed il pavigliun dalla Tiaratudestga. *Markus J. Haltiner* ha numnau quei ina eccellente posiziun. El ei il menader da project «Grischun all'Expo Milano 2015». L'exposiziun mundiala spetga 20 milliuns aspectaturs, da quels treis quartas Talians. 135 tiaras sepresentan alla exposiziun che cuoza digl emprem da matg tochen la fin d'october, 80 tiaras cun in agen pavigliun.

## In agen local d'exposiziun

Ils quater cantuns dil Gottard muossan l'exposiziun «Aua per la veta» en atgnas localitads. In monolit da crap dil Gottard fuorma sco reliev il center dall'exposiziun. Canals da schuada vallesanas pendan sur ils tgaus dils visitaders e



Presentaziun dil project ier a Cuera: da sen. ant. cusseglier guvernativ Claudio Lardi, Andrea Arcidiacono e Markus J. Haltiner

FOTO M. HARTMANNI

laian cuorer l'aua sur il monolit. Films dils quater cantuns e cartas postalas sco souvenirs completeschan l'exposiziun. Autras occurrzas ein «Las savurs dallas Alps» dils 3 da matg. In percours per ils senns informescha davart la produziun persistenta da victualias el territori alpin.

Schi datier dil Grischun nezegian era organisaziuns turisticas la caschun da sepresentar. Quei fa denton buca l'organisaziun tetgala Grischun Vacanzas, mobein las destinaziuns turisticas Engiadina/S. Murezi, Bergaglia, Valposchiavo, Viamala e San Bernardino, Mesolcina e Calanca. Ensemen cul Parc

Naziunal Svizzer muossan las organisaziuns turisticas moduls dall'exposiziun interactiva fatga pil giubileum da 100 onns Parc naziunal.

Sil sectur dalla cultura ei previu da presentar differentas formaziuns durant ils dis grischuns. Tgei artists grischuns ch'ain a Milaun ils dis reservai

al cantun ha Markus J. Haltiner buca vuliu tradir. La preschientscha dil Grischun alla exposiziun mundiala cuosta dus milliuns.

## Aua, meila, sal e caffè

La Svizra spetga treis milliuns visitaders el pavigliun ed ellas quater tuors da mintgamaì 15 meters altezia. Las tuors ein emplenidas cun aua, sal, meila e caffè. Quels products representan la Svizra persistenta, cun senn da responsabladad, tradiziunala ed innovativa. Il parlament federal ha concediu il 2012 in credit da varga 23 milliuns pil project. Da quei spetga la svizra otg milliuns da sponsurs. In da quels sponsurs ei en scadin cass Nestlé che presenta ella tuor da caffè siu product Nespresso. Suenter l'exposiziun duein las tuors vegnir nezegiadas sco siara (Gewächshaus). La gronda part dil material duvraus per la construcziun dil pavigliun svizzer e las tuora sa vegnir reutilisada.

## Culs mieds da traffic publics

Igl anteriur cusseglier guvernativ *Claudio Lardi* – el ei il delegau dil cantun Grischun el project Expo Milano 2015 – ha cussegliau da duvrar ils mieds publics per visitar l'exposiziun mundiala. Dils 6 da zercladur tochen ils 25 d'october augmenta il Grischun las capacitads existentas dil traffic public. Mintga di meina in auto da posta supplementar – igl Expo Express – la damaun dallas sis naven da Cuera a Blizuna. Da leu meina il tren a Milaun (Rho Fiera Expo).

# Sanar ed eventualmein engrondir

Il luvratori a Glion ademplescha buc ils basegns dils lennaris

DAD ANDREAS CADONAU

■ **Ils stabiliments dalla scola professiunala a Glion drovan ina remedura. Quella sanaziun cuosta in bionton dapl sche las uniuns grischunas da scrinaris e lennaris sedecidan a favur da Glion sco center per ils cuors interns da lur emprendistas ed emprendists. La vischnaunca dad Ilanz/Glion vul tener la scolaziun en Surselva.** Igl emprendissadi da lennari ei vegnien prolungius da treis sin quater onns e quei mida ils basegns viers las localitads da cuors integradas ella scola professiunala a Glion. Per cuntentar ils basegns dalla Uniun grischuna dils lennaris respectiv per segirar ils cuors che quella uniun porscha a ses emprendists ston las localitads vegnir engrondidas. Quei ha il menader dil secretariat dalla Uniun grischuna dils lennaris e dalla Uniun grischuna dils scrinaris, *Jürg Gasser*, getg. L'uniun dils lennaris ha affittau il luvratori dalla vischnaunca da Ilanz/Glion ed integrau ils scrinaris sco sutlocataris. Tenor las explicaziuns da *Jürg Gasser* ein omisdus uniuns motivadas da mantener il liug da cuors a Glion. Motivada da tener la formaziun interna da lennaris e scrinaris a Glion ei era la vischnaunca da Ilanz/Glion, sco quei ch'il president *Aurelio Casanova* ha confirmau. El ha menziunau ils discuors cun ils representants dalla duas uniuns e visau ad in preproject elavuras sco basa da discussiun. Il baghetg sco tal sto aschia ni aschia vegnir sanaus, ha il president communal fatg a saver. Secapescha ch'igl engrondiment dallas localitads augmentassi la summa d'investiziun visavi alla sanaziun sempla dil baghetg existent. La vischnaunca da Ilanz/Glion seigi denton

interessada da daventar in center dalla elavuraziun da lenn dils emprendists. Ella discussiun cun las duas uniuns da mistergners seigien era las pusseivladads da dimora per emprendistas ed emprendists stadas tematisadas. Per indicaziuns pli concretas era davart la summa d'investiziun seigi ei aunc memia baul. Las duas uniuns stoppien gl'emprem sedecider per il domicil da lur scolaziun interna. Lu

sappi la vischnaunca da Ilanz/Glion concretisar il project e lantschar la discussiun politica. «Sche nus fagein nuot vegn il luvratori realisau enzanu' auter.»

## Emprema decisiun croda igl avrel

La presidenta dalla Uniun grischuna dils scrinaris, *Barbara Schuler*, ha dau d'entellir che la suprastanza dalla uniun dils scrinaris vegni a sefatschentar proxima-

mein cun il project per sutmetter la fatschenta alla decisiun dalla radunonza generala dalla uniun dils scrinaris che ha liug ils 14 d'avrel. *Barbara Schuler* ha puntuau igl interess dils scrinaris grischuns da collaborar vinavon cun l'uniun dils lennaris e da mantener il domicil a Glion. Dumandada seigi denton primamein l'uniun dils lennaris che drovi egl avegnir in luvratori pli spazius. Alter-

nativas al project da Glion vegnien bein discutadas, ha il menader dil secretariat dallas duas uniuns, *Jürg Gasser*, getg, ellas seigien denton buca fetg concretas. Omisdus uniuns beneventien in eventual engaschi dalla vischnaunca da Ilanz/Glion el luvratori affiliaus alla scola professiunala. In tal engaschi beneventa era il menader dil Center da formaziun Surselva, *Curdin Tuor*. La scola professiunala industrialia ei integrada en quei center ed il menader valetescha ei per ordvart positiv sch'il luvratori ed ils cuors dallas duas uniuns restan ella vischinonza.

## Scola professiunala sto sbatter

La scola professiunala industrialia responsabla per la formaziun da scrinaris e miradurs ha da sbatter cun munconza da scolars. Sco quei che *Curdin Tuor* ha gia explicau dacuort avon il parlament regional sto l'instrucziun dad entginas classas vegnir reunida per segirar l'existenza dalla scola. Bein ein aunc buca tuttas annunziadas dad emprendistas ed emprendists sin meisa, buca tut ils contracts suttascrets. La situaziun semida magari a cuort termin. En vesta allas perspectivs el sectur da construcziun ei *Curdin Tuor* denton pertscharts ch'ei vegn era egl avegnir buca pli sempel da contonscher in adequat diember da scolars e scolars per la partiziun dalla scola professiunala. Ina scola che ha piars sin la fin dil davos onn da scola cun *Casimir Schmid* e *Christoph Schneller* duas persuna da clav al tgamun dalla instituziun. Da niev meina *Alois Derungs* quella partiziun ed ina part da sia lavur ei vegnida integrada ell'administraziun. «Ussa stuein nus mirar co quella soluziun secumprova.»



Il luvratori dalla scola professiunala sto vegnir sanaus ed eventualmein engrondius.

FOTO A. CADONAU